

Tarikh Dibaca: 14 Februari 2025M | 15 Sya'ban 1446H



ISLAMIC · SAVIOUR · OBEDIENCE

KHUTBAH JUMAAT

Tajuk:

**“KELEBIHAN SYA'BAN: PERSIAPAN
MENUJU RAMADHAN”**

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR

"KELEBIHAN SYA'BAN: PERSIAPAN MENUJU RAMADHAN"

الْحَمْدُ لِلَّهِ الْقَائِلِ : مَنْ كَانَ يُرِيدُ الْعِزَّةَ فَلِلَّهِ الْعِزَّةُ جَمِيعًا إِلَيْهِ
يَصْعَدُ الْكَلِمُ الطَّيِّبُ وَالْعَمَلُ الصَّالِحُ يَرْفَعُهُ وَالَّذِينَ يَمْكُرُونَ
السَّيِّئَاتِ لَهُمْ عَذَابٌ شَدِيدٌ وَمَكْرُ أُولَئِكَ هُوَ يَبُورُ ①

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا
عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى
آلِهِ وَصَحْبِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ اتَّقُوا اللَّهَ، أَوْصِيكُمْ وَإِيَّايَ
بِتَقْوَى اللَّهِ فَقَدْ فَازَ الْمُتَّقُونَ.

قَالَ اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا
تَمُوتُنَّ إِلَّا وَأَنْتُمْ مُسْلِمُونَ ②

Muslimin yang dirahmati Allah SWT sekalian,

Saya menyeru agar kita bersama-sama meningkatkan ketakwaan kita kepada Allah SWT dengan melaksanakan segala perintah dan meninggalkan segala perkara yang dilarang-Nya. Semoga kita semua

¹ Fatir : 10

² Ali-'Imran: 102.

diberikan kebahagiaan dan kejayaan di dunia dan akhirat. Para jemaah diingatkan supaya jangan bermain dengan telefon bimbit ketika khutbah disampaikan.

Pada hari yang mulia ini mimbar akan membicarakan khutbah bertajuk **"KELEBIHAN SYA'BAN: PERSIAPAN MENUJU RAMADHAN"**.

Hadirin Jumaat yang dirahmati Allah SWT,

Syukur ke hadrat Allah SWT yang mengizinkan kita berada dalam bulan Sya'ban, salah satu bulan yang agung dalam Islam. Bulan ini sering diabaikan kelebihannya oleh sebahagian umat Islam, namun ia mempunyai keistimewaan tersendiri. Rasulullah SAW sangat menggalakkan untuk kita memperbanyakkan amal ibadah pada bulan ini sebagai persediaan rohani bagi menghadapi bulan Ramadhan.

Dalam sebuah hadis yang diriwayatkan daripada Usamah bin Zaid Radiallahuanhu, beliau bertanya kepada Rasulullah SAW:

"Wahai Rasulullah, aku tidak pernah melihat engkau berpuasa dalam satu bulan sebagaimana engkau berpuasa di dalam bulan Sya'ban?"

Lalu baginda SAW menjawab:

ذَلِكَ شَهْرٌ يَغْفُلُ النَّاسُ عَنْهُ، بَيْنَ رَجَبٍ وَرَمَضَانَ،
وَهُوَ شَهْرٌ تُرْفَعُ فِيهِ الْأَعْمَالُ إِلَى رَبِّ الْعَالَمِينَ، فَأُحِبُّ أَنْ
يُرْفَعَ عَمَلِي، وَأَنَا صَائِمٌ."

"Itu adalah bulan yang mana manusia sering lalai akannya iaitu bulan yang berada di antara Rajab dan Ramadhan. Bulan tersebut adalah bulan

yang diangkat amalan-amalan kepada Rabb al-'Alamin (Allah SWT), maka aku suka ketika amalanku diangkat dalam keadaan aku sedang berpuasa".

(Riwayat al-Nasaie).

Hadirin Jumaat yang dikasihi Allah SWT,

Kelebihan beramal di bulan Sya'ban ini sangat bertepatan dengan firman Allah SWT dalam surah Fatir ayat 10 yang telah dibacakan pada awal khutbah, yang bermaksud:

"Sesiapa yang mahukan kemuliaan (maka hendaklah ia berusaha mencarinya dengan jalan mematuhi perintah Allah), kerana bagi Allah jualah segala kemuliaan. Kepada Allah lah naiknya segala perkataan yang baik (yang menegaskan iman dan tauhid, untuk dimasukkan ke dalam kira-kira balasan), dan amal yang soleh pula di angkatnya naik (sebagai amal yang makbul, yang memberi kemuliaan kepada yang melakukannya). Dan sebaliknya: orang-orang yang merancangkan kejahatan (untuk mendapat kemuliaan), adalah bagi mereka azab seksa yang berat; dan rancangan jahat mereka (kalau berkesan) akan rosak binasa."

Ayat ini menjelaskan bahawa kemuliaan hakiki hanya milik Allah SWT, dan sesiapa yang menginginkannya mestilah mencarinya melalui ketaatan kepada-Nya. Kemuliaan tidak terletak pada pangkat, harta, atau kedudukan duniawi, tetapi pada keimanan dan amal soleh yang dilakukan dengan penuh kehambaan.

Allah SWT menyatakan bahawa setiap perkataan yang baik, yang menegaskan keimanan dan tauhid serta amal soleh akan diangkat kepada-Nya. Ini menunjukkan bahawa setiap amal ibadah yang dilakukan dengan

niat yang ikhlas tidak akan sia-sia, sebaliknya akan diterima dan diberi ganjaran oleh Allah SWT.

Dalam konteks bulan Sya'ban, terdapat pandangan yang menyatakan bahawa bulan ini mempunyai keistimewaan kerana amalan tahunan diangkat oleh malaikat kepada Allah SWT. Justeru, inilah masa terbaik untuk memperbanyakkan amalan soleh seperti solat, puasa sunat, sedekah, membaca al-Quran serta berzikir agar ia diangkat dalam keadaan yang terbaik.

Sebaliknya, bagi mereka yang merancang kejahatan dan mengabaikan peluang untuk meningkatkan amal ibadah, Allah SWT memberi peringatan bahawa azab yang pedih menanti mereka. Segala perancangan buruk yang dilakukan tidak akan membawa manfaat, bahkan akan mengakibatkan kehancuran di dunia dan akhirat.

Sidang Jumaat yang berbahagia,

Bulan Sya'ban merupakan fasa persiapan yang wajar kita manfaatkan sebelum ketibaan bulan Ramadhan yang sangat dinanti-nantikan. Ia adalah kesempatan bagi setiap individu muslim untuk melatih diri dalam memperbaiki dan meningkatkan amal ibadah serta memperkukuh disiplin rohani agar dapat memasuki bulan Ramadhan dengan hati yang bersih dan jiwa yang bersedia.

Daripada Abu Salamah bahawa 'Aisyah Radiallahuanha menceritakan kepadanya, katanya:

"Rasulullah SAW tidak pernah melaksanakan puasa lebih banyak dalam sebulan selain bulan Sya'ban, ada kalanya baginda melaksanakan puasa bulan Sya'ban seluruhnya. Baginda bersabda: "Lakukanlah amal-amal

yang kalian sanggup melaksanakannya, kerana Allah tidak akan berpaling (dalam memberikan pahala) sampai kalian yang lebih dahulu berpaling (dari mengerjakan amal)". Solat yang paling Nabi SAW cintai adalah solat yang dijaga kesinambungannya sekalipun sedikit. Baginda bila sudah biasa melaksanakan solat (sunat) baginda menjaga kesinambungannya".

(Riwayat al-Bukhari dan Muslim).

Hadis ini mengajarkan kita bahawa pentingnya mengambil pendekatan sederhana dan realistik dalam ibadah, agar kita tidak cepat merasa penat atau bosan. Sesungguhnya amalan yang sedikit tetapi istiqamah lebih bernilai di sisi Allah SWT berbanding amalan besar yang dilakukan hanya sekali-sekala.

Hadirin Jumaat yang dikasihi Allah SWT,

Sesungguhnya, bulan ini juga memberikan ruang dan peluang untuk kita memperbaiki hubungan sesama manusia, membersihkan hati daripada hasad dengki, permusuhan, dan sifat mazmumah lain yang boleh menghalang keampunan Allah SWT.

Hadis daripada Abu Musa al-Asy'ari Radiallahuanhu bahawa Rasulullah SAW bersabda:

إِنَّ اللَّهَ لَيَطَّلِعُ فِي لَيْلَةِ النِّصْفِ مِنْ شَعْبَانَ فَيَغْفِرُ
لِجَمِيعِ خَلْقِهِ إِلَّا لِلْمُشْرِكِ أَوْ مُشَاحِنٍ

"Sesungguhnya Allah SWT melihat pada malam nisfu Sya'ban kemudian mengampunkan semua makhluk-Nya kecuali orang yang syirik dan juga orang yang bermusuhan".

(*Riwayat Ibnu Majah*).

Berdasarkan hadis ini juga, tidak dinafikan bahawa pada malam nisfu Sya'ban mempunyai kelebihan dan padanya terdapat keampunan serta penerimaan yang khusus bagi yang memohon ampun dan yang berdoa kepada-Nya. Disebabkan itu, Imam al-Syafie Rahimahullah mengatakan dalam kitabnya al-Umm:

"Doa mustajab adalah pada 5 malam, iaitu malam Jumaat, malam al-Adha, malam al-Fitri, malam awal bulan Rajab, dan malam nisfu Sya'ban".

Ibnu Rajab Rahimahullah juga menyebutkan dalam kitabnya *Lathائف al-Maarif* berkaitan malam nisfu Sya'ban, pada zaman dahulu para Tabi'in daripada penduduk al-Syam, seperti Khalid bin Ma'dan, Makhul, Luqman bin Amir, dan beberapa para Tabi'in yang lain memuliakannya (malam tersebut) dan mereka bersungguh-sungguh beribadah pada malam itu".

Sidang Jumaat yang dimulikan,

Islam tidak meletakkan sesuatu amalan khusus yang mungkin boleh dinisbahkan kepada Rasulullah SAW sebagai sunnah untuk diamalkan pada malam nisfu Sya'ban tetapi dalam masa yang sama, kita hendaklah mengambil peluang dengan kelebihan yang ada pada malam tersebut dengan beramal sebanyak-banyaknya sama ada dengan membaca al-Quran, solat sunat, berzikir dan lain-lain amalan secara umum.

Ingatlah, sesungguhnya keampunan Allah SWT itu luas, dan Dia sentiasa membuka pintu pengampunan kepada hamba-hamba-Nya yang benar-benar bertaubat dan ingin memperbaiki diri. Marilah kita bersama memanfaatkan bulan Sya'ban ini sebaik-baiknya untuk kita perbaharui

hubungan dengan Allah SWT dan mengeratkan ukhuwah sesama manusia, agar kita sentiasa berada dalam keredhaan-Nya, memperoleh keberkatan hidup dan keampunan daripada segala dosa-dosa yang lalu.

Janganlah kita lalai dan membiarkan bulan Sya'ban berlalu begitu sahaja tanpa mengambil manfaat daripadanya. Anggaplah ia sebagai madrasah persediaan sebelum melangkah ke bulan Ramadhan agar ibadah kita menjadi lebih sempurna, jiwa lebih khusyuk dan peroleh ketakwaan.

Hadirin Jumaat yang dirahmati Allah SWT,

Mengakhiri khutbah pada hari ini, marilah kita mengambil beberapa pengajaran untuk dijadikan panduan dalam kehidupan seharian:

1. Umat Islam hendaklah memperbanyakkan amal soleh dalam bulan Sya'ban seperti puasa sunat, membaca al-Quran dan berzikir agar amalan kita diangkat kepada Allah SWT dalam keadaan yang terbaik.
2. Umat Islam hendaklah sentiasa memelihara hubungan dengan memohon keampunan kepada Allah SWT di samping menunaikan hak-hak sesama manusia serta menyelesaikan perselisihan agar beroleh keberkatan dalam kehidupan.
3. Umat Islam hendaklah sentiasa berusaha memperbanyakkan dan menghidupkan amalan sunat serta meningkatkan kualiti ibadah di bulan-bulan yang mulia dengan mencontohi Rasulullah SAW.

أَعُوذُ بِاللَّهِ مِنَ الشَّيْطَانِ الرَّجِيمِ

وَمَنْ أَرَادَ الْآخِرَةَ وَسَعَىٰ لَهَا سَعْيَهَا وَهُوَ مُؤْمِنٌ فَأُولَٰئِكَ كَانَ
سَعْيُهُمْ مَّشْكُورًا ﴿١٩﴾

"Dan sesiapa yang menghendaki akhirat dan berusaha mengerjakan amal-amal yang baik untuk akhirat dengan usaha yang layak baginya, sedang ia beriman, maka mereka yang demikian keadaannya, diberi pahala akan amal usahanya."

(Surah al-Isra': 19)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا
فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ
إِنَّهُ هُوَ السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ
الْمُسْلِمِينَ وَالْمُسْلِمَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ

KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ الطَّيِّبَاتِ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ



مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا
مُحَمَّدٍ وَعَلَى آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ
الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ! أَوْصِيكُمْ وَإِيَّايَ
بِتَقْوَى اللَّهِ فَقَدْ فَازَ الْمُتَّقُونَ.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ
وَسَلِّمُوا تَسْلِيمًا ﴿٥٦﴾

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ
الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ
وَيَا قَاضِيَ الْحَاجَاتِ.

اللَّهُمَّ أَصْلِحْ أَيْمَةَ الْمُسْلِمِينَ وَوُلَاةَ أُمُورِهِمْ وَجَمِيعَ الْمُسْلِمِينَ
اللَّهُمَّ إِنَّا نَسْأَلُكَ وَنَتَوَسَّلُ إِلَيْكَ بِنَبِيِّكَ الْأَمِينِ، وَنَسْأَلُكَ
بِأَسْمَائِكَ الْحُسْنَى، وَصِفَاتِكَ الْعُظْمَى، أَنْ تَحْفَظَ بَعَيْنِ

عِنَايَتِكَ الرَّبَّانِيَّةِ، وَبِحِفْظِ وَقَايَتِكَ الصَّمَدَانِيَّةِ، جَلَالَةَ مَلِكِنَا
المُعْظَمِ، سُلْطَانَ سَلَاطُونِ، سُلْطَانَ شَرْفِ الدِّينِ ادریس شاه
الحاج ابن المرحوم سُلْطَانَ صَلَاحِ الدِّينِ عبد العزيز شاه
الحاج. اَللّٰهُمَّ اَدِمِ الْعُوْنَ وَالْهِدَايَةَ وَالتَّوْفِيقَ، وَالصِّحَّةَ
وَالسَّلَامَةَ مِنْكَ، لِوَلِيِّ عَهْدِ سَلَاطُونِ، تَعَكُّوْ اَمِيْر شَاهِ اِبْنِ
السُّلْطَانَ شَرْفِ الدِّينِ ادریس شاه الحاج، فِيْ اَمْنٍ وَصَلَاحٍ
وَعَافِيَةٍ بِمَنْكَ وَكَرَمِكَ يَا ذَا الْجَلَالِ وَالْاِكْرَامِ. اَللّٰهُمَّ اَطْلُ
عُمْرَهُمَا مُصْلِحِيْنَ لِلْمَوْظَفِيْنَ وَالرَّعِيَّةِ وَالْبِلَادِ، وَبَلِّغْ
مَقَاصِدَهُمَا لِطَرِيْقِ الْهُدَى وَالرِّشَادِ.

Ya Allah! kami berlindung dengan-Mu daripada ujian yang berat, daripada ditimpa kecelakaan, takdir yang buruk dan kegembiraan para musuh atas ujian dan kecelakaan yang menimpa kami. Ya Allah, kami mengharap perlindungan-Mu, daripada hilangnya nikmat yang Engkau berikan, dari berubahnya kesihatan yang Engkau kurniakan, lindungi negeri kami dari datangnya bencana dan malapetaka. Ya Allah, hanya Engkau yang Maha menyelamatkan, selamatkan umat Islam dan Masjid Al Aqsa di Palestin.

Ya Allah! Jadikanlah kami antara hamba-Mu yang menjaga amanah. Kuatkan iman kami agar menjauhi perbuatan khianat serta jauhkan kami



termasuk dalam golongan yang mengabaikan tanggungjawab dan jauhi negeri dan negara kami daripada kehancuran disebabkan perbuatan rasuah, penyelewengan dan salah guna kuasa. Serahkan tanggungjawab memimpin negara kami kepada hamba-Mu yang amanah dan jujur serta tegas lagi berani menegakkan kebenaran dan melaksanakan keadilan berlandaskan syariat. Jadikanlah Ya Allah masjid dan surau di Negeri Selangor rumah-rumah-Mu yang aman, mempersatukan dan menjadi nadi kekuatan ummah.

Kukuhkanlah Ya Allah, pegangan akidah umat Islam di negeri ini, akidah yang berteraskan Ahli Sunnah Wal Jamaah yang berada di atas jalan Nabi Muhammad SAW dan para sahabat Radiallahuanhum serta jauhkanlah kami daripada segala fitnah yang boleh menggugat kesatuan dan perpaduan umat Islam.

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ وَاجْعَلْنَا لِلْمُتَّقِينَ إِمَامًا ﴿٧٤﴾
رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ ﴿٢٠١﴾
عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ
عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩٠﴾
فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ نِعَمِهِ يَزِدْكُمْ،
وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا
تَصْنَعُونَ.